

АКАФИСТ

пресвятой Богородице пред иконой



«ТРОЕРУЧИЩА»

Кондак 1

Взбранной Воеводе, Богообрадованной Приснодеве
Богородице, посетившей Гору Афонскую явлением
чудотворныя иконы Своей и многия милости ею дарующей
роду христианскому, похвальное возглашаем ныне пение;
Ты же, о Богомати, яко имущая державу непобедимую и
Матернее о нас попечение, предвари на помощь к нам и
от всяких бед избави зовущих Ти:

**Радуйся, Помощнице наша, Троеручною иконою Твою
нам помогающая.**

Икос 1

Ангел земный и человек небесный преподобный Иоанн
Дамаскин от любве теплыя к Тебе, Богомати Владычице,
икону Твою святую соорудити потщася и сию в келлии своей
благоговейно поставив, пред нею сице Тебе в молитвах
усердных глаголаше:

**Радуйся, Радость вечную, Спасителя миру рождшая; радуйся,
всегубительного ада силу Рождеством Твоим поправшая.**

**Радуйся, пророческих глаголов исполнение принесшая;
радуйся Адама и Евы преступление загладившая.**

**Радуйся, Единаго от Троицы на руку Твою нетрудно
носившая; радуйся, Огнь Божества неопально во чреве
Твоем вместившая.**

**Радуйся, Помощнице наша, Троеручною иконою Твою
нам помогающая.**

Кондак 2

Видя преподобный Иоанн Дамаскин десницу свою, много
писавшую в защиту чести и поклонения святых икон, по
навету царя иконоборца немилостиво отсеченную, испроси
ю от невернаго мучителя и, приложив к усеченному ея
составу, пред честною иконою Твою, Пречистая Дево,
слезно молящеся Ти, о еже исцелитися ей. Ты же, Всеблагая
и Всемощная рода нашего Заступнице, молитву его скоро
услышала еси и, во сне представши ему, исцеление
усеченной руце его даровала еси, да благодарственно
поет Богу: Аллилуя.

Икос 2

Разум человеческий не может постигнуть силу исцелений благодатных, иконою Твою, о Богомати, чудесно являемых, не может изъяснити и чудо велие, како отсеченная десница преподобного во едину нощь цела и здрава обретеся, на нейже токмо червленный знак бывшия язвы оставлен бысть Врачебницею Благою, слышащею от нас сия похвалы:

Радуйся, скоро являющаяся утешительнице скорбящих душ; радуйся, радостотворная посетительнице болезнующих сердец.

Радуйся, безнадежных страдальцев надеждою исцеления ободряющая; радуйся, врачами оставленных болезнующих на Свои руце приемлющая.

Радуйся, усеченную десницу Божия избранника целу и здраву вышеестественно соделавшая; радуйся, яко ничтоже невозможно Тебе, Милосердая Предстательнице, нам всегда заступление показующая.

Радуйся, Помощнице наша, Троеручною иконою Твою нам помогающая.

Кондак 3

Силу десницы Всеышняго в исцелении усеченной десницы своея познав богохаголивый Иоанн, песнями красными воспе Тя, Владычице Всеблагая, и подобие усеченныя руки своея приложи к целебному Твоему образу ради памяти всегдашния о великом чудеси. Тем ныне видима есть и именуется сия святая икона Твоя Троеручица, тремя руками, на ней написанными, проявляющая таинство Святая Троица, чудесы же, от нея бывающими, всех приводящая хвалебно взывать ко Господу: Аллилуия.

Икос 3

Имей велию ревность по Бозе, духоносный песнописец Святая Церкве и Божественный славитель ея, сладкий преподобный Иоанн, хвалебными пеньми до конца жизни своея прославляше Твою к нему дивную милость, Богородительнице, в память же бывшаго чудесе плат, имже усеченная рука его обязана бе, на главе своей ношаще, икону же Твою многоцелебную, яко наследие богатое, святей

Лавре преподобного Саввы Освященного по себе остави,
да вси верни зовут к изображеней на ней Целительнице
душ и телес сице:

Радуйся, врагов святыя православныя веры крепкая
поборнице; радуйся, проповедников Евангельского учения
покровительнице.

Радуйся, благочестивых христиан защито и похвало;
радуйся, боголюбивых иноков утешение.

Радуйся, ведущим брань противу мира, плоти и диавола
добрая споспешнице; радуйся, ревнующим о целомудрии
и чистоте изрядная пособнице.

Радуйся, Помощнице наша, Троеручною иконою Твою
нам помогающая.

Кондак 4

Буря недоумения смущает ми ум, како возмогу недостойными
усты воспети славу Твою, Пречистая Дево, юже во иконе
Твоей святей явила еси, даровавши ю нам в помощь и защиту
от враг видимых и невидимых. Темже, величая неисчисленная
милости Твоя к роду христианскому, исповедую чудеса
Твоя и смиренномудренно пою Вседержителю: Аллилуя.

Икос 4

Слышавше иноцы святыя Лавры Саввы Освященного о
великих добродетелех пришедшаго в Лавру на поклонение
первосвятителя сербского Саввы, по внушению Твоему,
Богомати, дароваша ему на благословение святую икону
Твою Троеручицу, юже он со благоговением, яко дар
многоценен, в страну Сербскую принесе, поучая паству
свою звати Тебе:

Радуйся, от востока и до запада силу всемогущества
Христова иконою Твою возвещающая; радуйся, болезни
душевные и телесные иконою Твою скоро врачующая.

Радуйся, Сербстей стране икону Твою в залог благоволения
даровавшая; радуйся, чудесы Твоими Православие в ней
крепко утвердившая.

Радуйся, Симеона Мироточиваго область благодатно

посетившая; радуйся, Саввы первопрестольного паству
Матерним покровом Твоим приосенившая.

Радуйся, Помощнице наша, Троеручною иконою Твою
нам помогающая.

Кондак 5

Боготечней звезде подобна явися икона Твоя, Богородительнице,
по воли Твоей святей на осля поставленная и отпущенная
из Сербии: осличи, никимже водиму, принесеся им на Гору
Афонскую ко вратом обители Хиландарского, юже яко
дар небесный восприимше иноцы, поставиша в алтаре
соборных церкве обители, зовуще во умилении глубоцем
благих Подателю Богу: Аллилуиа.

Икос 5

Видевше иноцы хиландарстии Твое к ним благоволение,
Преблагословенная Дево, в чудеснем пришествии к ним
святыя иконы Твоей Троеручицы явленное, с радостию и
любовию ей поклоняхуся, целующе и песненно возглашающе
Ти благохваления сицевая:

Радуйся, путеводительнице подвижников благочестия
к горнему Сиону; радуйся, пустыннолюбивых иноков
приводящая к небесному Иерусалиму.

Радуйся, безсловесное осля воли Твоей святей чудесно
покорившая; радуйся, на осличи икону Твою благодатную
от Сербии на Афон дивно принесшая.

Радуйся, пустыню Афона благоуханием святыни исполнившая;
радуйся, Хиландарскую обитель благоволением Твоим
благодатствовавшая.

Радуйся, Помощнице наша, Троеручною иконою Твою
нам помогающая.

Кондак 6

Проповедует обитель Хиландарская на Афоне богатство
милостей и щедрот Твоих, Богородице Дево, и светло
красуется, имущи святую икону Твою Троеручицу во игумена
себе, ибо таковая бысть воля Твоя, еже пребывать иконе
Твоей тамо на игуменстем месте во храме Божием и в

душах братии, от Тебе Единая благословение на всякое послушание приемлющей и хвалебно зовущей тако благоволившему о них Творцу: Аллилуиа.

Икос 6

Возвестила еси волю Твою, Богомати, иноком хиландарским, разногласием во избрании игумена смущенным, чудесно поставивши святую икону Твою на игуменстем месте во храме Божием и открывши единому от них в видении, яко Сама Ты хощеши пребывать настоятельствующею в обители их иконою Твою честною, и да прочее не избирают себе игумена. Они же во умилении душ и сердец, обрадованнии возопиша к Тебе:

Радуйся, иноков благоподвизающихся известная и всемощная Покровительнице; радуйся, к Сыну Твоему и Богу теплая о них Предстательнице.

Радуйся, жезл игуменский в Хиландарстей обители невидимо приемшая; радуйся, обитель сию доселе целу и благоустроену сохраняющая.

Радуйся, страхом и благоговением сердца братии, благословение от иконы Твоей приемлющих, исполняющая; радуйся, неблагоговейныя и дерзостныя грозно наказующая.

Радуйся, Помощнице наша, Троеручною иконою Твою нам помогающая.

Кондак 7

Хотя соделати не токмо Афон, но и вся иные страны православныя причастны благодати великих чудес, иконою Твою Троеручною изливаемых и бывающих, Пречистая Владычице, сию во всех градех, весех, церквях и обителех иноческих распространила и дивными чудесами прославила еси. Темже вся верная чада святую икону Твою Троеручицу любовию чествуют и на ней вкупе с Тобою изображеному Христу усердно зовут: Аллилуиа.

Икос 7

Дивно являєши, Преблагословенная Деvo, милости верным людем и святою иконою Твою Троеручицу преславныя чудеса содеваєши силою Благодати Христовы: слепыя

просвещаеши, разслабленныя укрепляеши, недужныя врачуеши и всем прибегающим к целебному Твоему образу скорую помощь Твою присно являеши, подвизающи звати к Тебе:

Радуйся, Святую Гору Афонскую в жребий Себе избравшая; радуйся, и вся страны православныя покровом милости Твоей осенившая.

Радуйся, Хиландарских обители настоятельнице неизменная; радуйся, многих мест и пустынь сокровище исцелений неоскудное.

Радуйся, на Афоне, в России, Сербии и иных странах иконою Твою преславно чудодействующая; радуйся, любящия и чущия Тя от всяких бед избавляющая.

Радуйся, Помощнице наша, Троеручною иконою Твою нам помогающая.

Кондак 8

Странно есть видети инохи хиландарских, к иконе Твоей, яко к игумену приходящия и от Нея благословение на послушания своя приемлющия. Но, о Всеблагая, якоже приемлеши их милостиво и благословляеши, тако и нас, недостойных, не лиши Матеряго Твоего милосердия и попечения, приими благоутробно молитвы наша пред святою иконою Твою возносимыя, осени нас благословением Твоим благодатным, избави от всяких бед и скорбей и научи богоугодно пети Триединому Богу: Аллилуя.

Икос 8

Весь мир преисполнен, яко звездами богосветлыми, чудотворными иконами Твоими, Богородице Дево, в нихже, яко денница лучезарная, икона Твоя Троеручица предивными чудесы благодатно сияет и согревает хладныя сердца наша знаменными Твоего к нам милостиваго призрения. Сего ради чествуем пречистаго лика Твоего святое изображение и Тебе пред ним вопием:

Радуйся, Богообрадованная и Пренепорочная Приснодево; радуйся, Едина Чистая и Благословенная в женах.

Радуйся, нетленная и неискусобрачная Агнца и Пастыря

Мати; радуйся, прекрасная и светоносная палата святых
святейшаго Слова.

Радуйся, крине белоснежный и благовонный девства и
чистоты; радуйся, Царице и Владычице Небесе и земли.

Радуйся, Помощнице наша, Троеручною иконою Твою
нам помогающая.

Кондак 9

Всяк возраст верных благопользуется Твоим Матерним
попечением, Всеблагая Владычице: младенцы милосердно
окормляеши, отроки невидимо руководствуеши, мужи во
благочестии утверждаеши, старцы в немощех укрепляеши,
всем же вся благая и душеполезная даруеши всесильным
ходатайством Твоим у Престола Пресвятыя Троицы, Ейже
благодарно поем: Аллилуия.

Икос 9

Витии человечествии не могут достойно восхвалити Тя,
Богородице, честнейшую Херувим и славнейшую Серафим,
рождшую Единаго от Троицы Христа Жизнодавца. Мы же,
любовию к Тебе воодушевленнии, смиренномудренно
дерзаем приносити Тебе песни таковыя:

Радуйся, державная заступнице рода христианского; радуйся,
благосердая Мати всех скорбящих и обремененных.

Радуйся, кротким сиянием Твоим мрак грехов и страстей
наших разгоняющая; радуйся, на стези покаяния нас
премудро наставляющая.

Радуйся, в грозный час смерти всем нам крепкая защитнице;
радуйся, доброго ответа нам пред Судиею Праведным
усердная ходатаице.

Радуйся, Помощнице наша, Троеручною иконою Твою
нам помогающая.

Кондак 10

Спасения залог даровася нам святая и всечестная икона
Твоя, Богородительнице Дево, ибо, якоже древле прорекла
еси божественному евангелисту Луце, с нею и доныне сила

Твоя благодатно пребывает, чудесы преславными веру в нас утверждает, недужныя безмездно врачуя и на путь спасения души наша приводит, да зовем прославльшему имя Твое во вселенней Царю Небесе и земли: Аллилуиа.

Икос 10

Стена еси девам и ликом иноческим, Богоневестная Дево, всем усердно к Тебе прибегающим, икону же Твою святую благоговейно чествующим, ибо сию дарова нам благих податель Господь в помощь и врачевство недугом душевным и телесным и сим внушиает пети Тебе:

Радуйся, добрая младопитательнице дев и безматерних сирот; радуйся, иноков и инокинь благоскорбящих предводительнице к наградам небесным.

Радуйся, в узах и темнице седящих посещающая утешением благодатным; радуйся, благословение домов и супружеств благочестивых.

Радуйся, юных наставнице целомудрия и воздержания; радуйся, старцев приводящая к благому житию и мирней кончине.

Радуйся, Помощнице наша, Троеручною иконою Твою нам помогающая.

Кондак 11

Пение молебное наше, Тебе пред пречистым образом Твоим с верою и любовию возносимое, милостиво услыши, Госпоже Всемилостивая, и сохрани нас от тлетворных учений, неверия и суеверия, имиже наветуется в нас святоотеческая православная вера, избави нас от лукавых совращений, сохрани нас и Отечество наше от всяких крамол и от всяких нестроений и злых развращений, врагами веры и Отечества нашего воздвизаемых, и сподоби в любви и единомыслии со всеми верными чадами Святыя Христовы Церкве богоприятно пети Создателю нашему: Аллилуиа.

Икос 11

Светоприемлемая свеща икона Твоя святая, Богородице Дево, мир весь сиянием чудес просвещает, сердца же наша любовию воспламеняет к Тебе, Пречистей и

Преблагословенней Матери Сладчайшаго Господа нашего Иисуса Христа, даровавшаго нам Тебе в покров и защиту противу полчищ сатанинских, иже боятся и трепещут самаго имени Твоего, ведающе силу Твою, юже величаем и Тебе зовем:

Радуйся, враги наша видимыя и невидимыя премудро запинающая; радуйся, хулителей святыя православныя веры невидимо карающая.

Радуйся, духов злобы от нас державно отгоняющая; радуйся, преовладети им над нами не попускающая.

Радуйся, любвию к Богу и ближним нас воодушевляющая; радуйся, вся благая прошения наша скоро исполняющая.

Радуйся, Помощнице наша, Троеручною иконою Твою нам помогающая.

Кондак 12

Благодать свыше даровася святей иконе Твоей Троеручице, Владычице Преблагая: скорбящия утешати, болеющих исцелити, слепыя просвещати, разслабленныя укрепляти, верных во благочестии утверждати, неверных к познанию истины приводити, знаменьми и чудесы от нея бываемыми, яже воистину превосходят разумение человеческое и токмо верою постигаются, приводяще верных души к немолчному славословию Творца богокрасною песнию: Аллилуя.

Икос 12

Поем чудеса Твоя, благодатная Богородительнице, не тайм щедрот Твоих, исповедуем благодеяния Твоя, прославляем неисчислную милость Твою к роду христианскому, юже ведят вси концы земли, ибо от востока до запада хвально имя Твое святое, благословляемое от всех родов и в молитвах призывающее во всех странах. Тебе убо, сице прославленней и превознесенней Сыном Твоим и Богом, и мы хвалебно вопием:

Радуйся, тихое пристанище плавающих в пучине житейского моря; радуйся, треволнение страстей умиротворяющая Своим сердобольным участием.

Радуйся, во уныние и отчаяние впадших подъемлющая

надеждою спасения; радуйся, сомнениями в вере колеблющихся вразумляющая знаменьми и чудесы.

Радуйся, в обителех иноческих подвизающимся богоугодно подательнице блаженного упокоения; радуйся, и в мире благочестно живущия не лишающая Твоего заступления.

Радуйся, Помощнице наша, Троеручною иконою Твою нам помогающая.

Кондак 13

О Всепетая Мати Сладчайшаго Искупителя нашего Господа Иисуса Христа! Вонми гласу молебному, Тебе пред святою иконою Твою нами смиренно возносимому, и Матернею молитвою Твою к рождшемуся от Тебе святых святейшему Слову от всякия избави напасти и вечныя муки всех имя Твое молитвенно призывающих и о Тебе благодарно зовущих Богу: Аллилуя

[Сéй кондáк глагóлется трíжды.]

[Далее повторяем 1-е икос и кондак:]

Икос 1

Ангел земный и человек небесный преподобный Иоанн Дамаскин от любве теплыя к Тебе, Богомати Владычице, икону Твою святую соорудити потщася и сию в келлии своей благоговейно поставив, пред нею сице Тебе в молитвах усердных глаголаше:

Радуйся, Радость вечную, Спасителя миру рождшая; радуйся, всегубительного ада силу Рождеством Твоим поправшая.

Радуйся, пророческих глаголов исполнение принесшая; радуйся Адама и Евы преступление загладившая.

Радуйся, Единаго от Троицы на руку Твою нетрудно носившая; радуйся, Огнь Божества неопально во чреве Твоем вместившая.

Радуйся, Помощнице наша, Троеручною иконою Твою нам помогающая.

Кондак 1

Взбранной Воеводе, Богообрадованной Приснодеве
Богородице, посетившей Гору Афонскую явлением
чудотворныя иконы Своей и многия милости ею дарующей
роду христианскому, похвальное возглашаем ныне пение;
Ты же, о Богомати, яко имущая державу непобедимую и
Матернее о нас попечение, предвари на помощь к нам и
от всяких бед избави зовущих Ти:

**Радуйся, Помощнице наша, Троеручною иконою Твою
нам помогающая.**

Молитва 1-я

О Пресвятая Госпоже Владычице Богородице, велие чудо
святому Иоанну Дамаскину явившая, яко веру истинную и
надежду несомненную показавшему! Услыши нас, грешных,
пред чудотворною Твою иконою усердно молящихся и
просяющих Твою помощи: не отрини моления сего многих
ради прегрешений наших, но, яко Мати милосердия и
щедрот, избави нас от болезней, скорбей и печалей, прости
содеянные нами грехи, исполни радости и веселия всех,
чтущих святую икону Твою, да радостно воспоешь и любовию
прославим имя Твое, яко Ты еси от всех родов избранная
и благословенная во веки веков. Аминь.

Молитва 2-я

О Пресвятая и Преблагословленная Дево Богородице Марие!
Припадаем и покланяемся Ти пред святою Троеручною
иконою Твою, воспоминающе преславное чудо Твое
исцелением усеченныея десницы преподобного Иоанна
Дамаскина, от иконы сея явленное, егоже знамение доныне
видимо есть на ней, во образе третия руки, к изображению
Твоему приложенныя. Молимся Ти и просим Тя, Всеблагую
и Всещедрую рода нашего Заступницу: услыши нас,
молящих Ти ся, и якоже блаженного Иоанна, в скорби и
болезни к Тебе возопившаго, услышала еси, так и нас
не презри, скорбящих и болезнующих ранами страстей
многоразличных и к Тебе от души сокрушенныя и смиренныя

усердно прибегающих. Ты зриши, Госпоже Всемилостивая, немощи наша, озлобление наше, нужду, потребу нашу в Твоей помощи и заступлении, яко отвсюду враги окружени есмы, и несть помогающего, ниже заступающего, аще не Ты умилосердишися о нас, Владычице. Ей, молим Ти ся, вонми гласу болезненному нашему и помози нам святоотеческую Православную веру до конца дней наших непорочно сохранити, во всех заповедех Господних неуклонно ходити, покаяние истинное о грехах наших всегда Богу приносити и сподобитися мирныя христианския кончины и доброго ответа на Страшном Суде Сына Твоего и Бога нашего, Егоже умоли за нас Матернею молитвою Твою, да не осудит нас по беззаконием нашим, но да помилует нас по велицей и неизреченней милости Своей. О Всеблагая! Услыши нас и не лиши нас помощи Твоей державныя, да, Тобою спасение получивше, воспоем и прославим Тя на земли живых и рождшагося от Тебе Искупителя нашего, Господа Иисуса Христа, Ему же подобает слава и держава, честь и поклонение, купно со Отцем и Святым Духом, всегда, ныне и присно, и во веки веков. Аминь.

Величаем Тя, / Пресвятая Дево, / и чтим тричи
сленное изображение пречистых рук Твоих, / Ты бо
двема Сына и Господа держиши, // третиею от напа
стей и бед нас избавляеши.

